

服治素


鹽蠱

女  
藥新

方法方





A decorative border with a central illustration of a horse running through clouds. The horse is depicted in a dynamic, galloping pose, facing left. It is surrounded by stylized, swirling clouds that fill the top portion of the frame. The entire composition is enclosed within a thick, black border featuring a repeating, intricate scrollwork pattern.

服 鹽 藥 法

孫 星 衍 錄

叢書集成初編

(補印本)

服鹽藥法及其他二種

一九三七年六月初版  
一九五九年十月補印

商務印書館出版

上海大眾文化印刷廠印刷

# 服鹽藥法

無藥州土。則須服之大益。

成州鹽官第一。

次絳州封井。

次鹽州富因井。

次益州貴平井。

上四井鹽可服之。

右服法。先以大豆許鹽置口中。勿咽之。須臾津液滿口。令近齒。以方寸匕鹽內口。和津液一時咽之。日一服。

凡瘡新患者。一服得快利即愈。百日以上者。五服差。若一月服之。終身不發。

諸下痢。初患一兩服即差。赤白久痢經年者。一七二七服差。

諸心腹痛結宿癖積聚。吐逆食不化者。一年以上。二三十年。不過三月服之。其痢及諸病皆愈。初服時痢益極者勿怪。

諸氣滿喘逆不能食者。一服即散。日服之。則根本皆除。

大氣熱疾。頭痛目眩。四肢煩熱者。一服得吐利差。

諸頭面皮膚百節皆風。一月服之差。若初服十日內。眉間益悶勿怪。諸痰飲欬逆不能思食者。一服差。

諸虛勞傷損骨節疼痛。起止失聲者。二七日服之。少氣乏力。面無顏色。十日服之。能三十日服佳也。常以平旦空腹服之。率以三七爲節。須得吐利者。須一度多服。三七以上。令人大吐利。終不傷人。若覺煩熱。數飲冷水。若至他方異域。不伏水土。到卽服之。得一升。百事不懼。鹽能補虛去冷熱。若有宿食不消。變成霍亂。一服卽差。

肘後備急方卷八服鹽方。

服鹽方。療得熱病頭痛目眩。并卒心腹痛。及欲霍亂。痰飲宿食。及氣滿喘息。久下赤白。及積聚吐逆。乏氣少力。顏色痿黃。瘴癘諸風。其服法。


取上好鹽。先以大豆許口中含勿咽。須臾水當滿口。水近齒。更用方寸匕抄鹽內口中。與水一時咽。不爾。或令消盡。喉若久病。長服者。至二三月。每旦先服。或吐或安。擊卒病可服三方寸匕。取卽吐痢。不吐痢病更加服。新患瘧者卽差。心腹痛及滿得吐下亦佳。久病每以心中熱爲善。三五日亦服佳。加服取吐痢。痢不損人。久服大補。補豚腎氣。五石無不差之病。但恨人不服。不能久。取此療方不一。小品云。卒心痛。鬼氣宿食不消。霍亂氣滿。中毒。鹹作湯。服一二升。刺便吐之。良。按肘後備急方。後人增附。不垂出于葛氏。故列千金翼後。

右孫氏云。成州鹽官者。成州今甘肅成縣。宋書氏胡傳。仇池地方百頃。四面斗絕。高平方二十餘里。羊腸盤道二十六回。上豐水泉。煮土成鹽。今在成縣西。一名瞿堆。又名仇池山也。又寰宇記。階州出石鹽。未知孰是。云次。緜州封井者。緜州卽今州治。隋書地理志。巴西有鹽井。唐地理志。巴西魏城羅

江鹽泉有鹽。巴西等縣皆在今州境。元和郡縣志：陽下鹽井在鹽泉縣西一里。今在州界。有中井十一所。下井十所。云次鹽州富因井者。漢地理志：安定三水有鹽官。水經河水注：縣東有溫泉。溫泉東有鹽池。城北有三泉。疑卽縣之鹽官也。今甘肅寧夏花馬池鹽也。云次益州貴平井者。華陽國志：牛鞞縣有陽明鹽井。牛鞞卽今簡州。西魏置貴平縣。在州境。井以爲名也。元和郡縣志：陽明鹽井在陽安縣北十四里。又有牛鞞等四井。又上軍井。下軍井。並鹽井也。在平泉縣北二十里。今州鹽井共九十三。陽安平泉皆在今州境。然則此四井二在四川。二在甘肅也。按神農本經：有戎鹽。大鹽。鹵鹽三種。云戎鹽味鹹寒無毒。主明目目痛。益氣堅肌骨。去毒蠱心腹痛。溺血吐血。齒舌血出。一名胡鹽。生胡鹽山。及西羌北地酒泉福祿城東南角。北海青南海赤。大鹽主腸胃結熱喘逆。胸中病。生邯鄲及河東治澤。鹵鹽主大熱消渴。狂煩除邪。及下蠱毒。去五臟腸胃留熱。結氣。心下堅。食已嘔逆喘滿。明目目痛。生河東鹽池。說文：鹵。西方鹹地也。安定有鹵縣。天生曰鹵。人生曰鹽。鹽在正東方。鹵在正西方。此據一切經音義卷二引。東方謂之斥。西方謂之鹵。故禹貢兗州海濱廣斥。鄭康成注斥謂地鹹鹵。是本經鹵鹽卽東海之鹽。名醫以生河東鹽池注鹵鹽。與古義違失。陶宏景別錄云：東海北海鹽。及河東鹽池。梁益鹽井。交廣有南海鹽。西羌有山鹽。胡中有樹鹽。而色類不同。以河東者爲勝。又云黑鹽主腹脹氣滿。胡鹽主耳聾目痛。又云黑鹽疑鹵鹽。孫真人所云四井鹽。雖皆指涼益之鹽。然考之名醫所注鹵鹽。亦云去五臟腸胃留熱。結氣。心下堅。食已嘔逆喘滿。明目目痛。則知東海鹽主治各病。亦與涼

益井鹽同功矣。此服鹽藥法。最爲簡易。時俗庸醫。爲人治疾。不按古書。不知脈理。但用俗書所謂本草綱目。不知李時珍。妄改神農經藥物次序藥性。臆爲增加。其謬實甚。或遇富貴人。先投入參。停食阻氣。以致殞命。故古人有不服藥爲中醫之說。謹案漢時知醫者。有淳于意。張仲景。華陀諸人。猶以不服藥爲中醫。今則妄人爲醫。當以不服藥爲上醫矣。鹽旣治諸心腹病痛。遠方鄉邨貧戶。一時不能卒致醫藥。可以如法服之。亦必無所損。千金翼方。世不多見。四庫書亦未及載。故摘錄此條。刊布以廣其傳云。辛未年三月十五日。五松居士記。





治 壘 新 方

路 順 德 纂  
繆 福 照 重 訂

# 序

昔大禹鑄鼎象物。使民知神姦而爲之備。後世賴焉。然此皆有形有質。故得按圖而稽之。未若近世蠱之害人。其爲毒也無形。其中人也至烈。而其來也一發不可復制。嗚呼。豈不痛哉。蓋南方地氣卑下。溼氣薰蒸。乘其氣者。毒每倍于他方。加以獠苗雜處。俗尙巫鬼。凡諸幻術。皆非意計所及。蓋蠱之由來久矣。余中年爲親負米。浮湘之粵。渡彭蠡以歸。凡洞庭南北。象郡西東。及滇閩邊界。足跡幾遍。計自戊寅迄甲午十七年。往來蠻烟瘴雨中。無日不臨深履薄。予雖幸免斯毒。而竊悲染此毒者。思有以治之而未得也。壬午春。道出南寧。於旅肆中得鈔本治蠱新方一書。其言半雜融縣土音。其所抄錄亦魯魚殆半。猝猝未暇訂正也。乙酉丙戌間。客博白之大嶺埠。埠介山澤間。莠民之以蠱流毒者。指不勝屈。其地荒僻。鮮醫藥。余心憫焉。爲之按方施藥。應手輒愈。乃取是書。通其語言。訂其譌舛。郵寄同人。廣爲流布。今已倦歸故里。桑梓熙恬。民淳物阜。無復中蠱之患。然回思前此求治諸人。呼號匍匐。如在目前。痛定思痛。愈滋疚焉。因復取而校之。而誌其緣起如此。嗚呼。毒之生于天者。吾無如何矣。安得良有司者。取人之所爲蠱。而禁之。而化之哉。是則所謂功不在禹下者矣。道光乙未花朝後三日。澄江漁者繆福照介夫氏序。

# 治蠱新方

清 路順德纂

繆福照重訂 順德字應侯融縣人  
福照字介夫江陰人

## 蘇荷湯

能治一切蠱症。凡蛇蠱疔蠱。腫脹癩狂痢症。以及一切感冒咳嗽氣逆沖上。肚皮緊急。審係內伏實火。小便黃赤。或服補藥。而病加重者。用此湯方加減治之。百發百中。

紫蘇一兩

南薄荷一兩

條參八錢

連翹八錢

生黃芪七錢

當歸一兩

生首烏一兩

白芷一兩

川芎五錢

決明子五錢

槐花一兩

生白芍五錢

柴胡六錢

青蒿一兩

生元版八錢

右十五味爲一劑。水煨服。服三四劑後。病漸減者。加燒酒二兩。同水久煨服。取效更速。又此方每劑加田州三七二錢。更驗。又初服藥不可太急。急則內毒翻跳。病人不安。或大吐大瀉。病愈固速。而病人頗畏。至服藥五六劑。則無妨也。

右服藥一二劑後。內火炎上。大便結秘。口舌熱爛者。去當歸。白芷。川芎。紫蘇。薄荷。加黃柏。黃芩。茯苓。元參。天門冬。澤瀉。石膏。各五錢。酒一茶杯。同水久煨服。小便赤。火盛者。加元參。梔子。茯苓。各五錢。帶熱嗽。或咳血者。審係內有實火。紫蘇。薄荷。暫停不用。並除當歸。白芷。川芎。加三七。百合。麥門冬。各一兩。

水煨服。時而傷寒帶寒嗽者，仍用焦薑、陳皮、洋參、丁香、當歸、川芎、杏仁、半夏、炙黃耆、首烏、炙甘草、寒在裏，則加肉桂等藥一二劑，以治其標。嗽漸愈，復用蘇荷湯加減以治其本。或人弱帶痢者，去條參、連翹、槐花、柴胡、生芪、青蒿、生地、紫蘇、薄荷、決明子、加百合、附子、扁豆、淮山、藥砂仁、白朮、乾薑、各三錢。洋參、丁香、木香、各一錢。水煨服。又服蘇荷湯已久，蠱毒將淨，火退腰痛者，去條參、連翹、生黃芪、槐花、柴胡、青蒿、生地、決明子、生芍藥、紫蘇、薄荷、加廣陳皮、五錢，或加熟地五錢、肉桂二錢、焦薑五錢、丁香三錢、炙甘草三錢、杜仲二錢、炒白朮三錢、酒炒芍藥三錢、茯苓一錢。水煨服。或病人脾腎虛寒，後復中蠱，或服蘇荷湯已久，蠱毒既淨，五臟虛寒，則蘇荷湯不可用，宜用溫補行氣之藥，詳見後篇。

忌喫諸物

狗肉、雞、鴨、雉、雞、魚、蚌、螺、蝦、等物，愈後尙要戒一二年。川山甲、有鱗等物，愈後要戒四年。蛤、戒十年。蛇、終身不可吃。糖、甘蔗、紅棗、黑棗、一切生蟲招疳之物，服藥時宜戒，愈後可喫。蘿蔔菜，惟中疳者宜戒，愈後可喫。蘿蔔菜不可喫。

以上宜戒之物，務要嚴為戒口，服藥方驗，稍不謹慎，病必復翻。

宜喫諸物

- 筍
- 豆腐
- 苜蓿菜
- 青菜
- 白菜
- 菠菜
- 蒜
- 蓮藕
- 紫蘇
- 薄荷
- 芥藍
- 芡實
- 苦瓜
- 細粉
- 木耳
- 薑
- 茨菇
- 芋苗
- 豆角
- 筍水每碗放一茶杯，同菜煮吃妙。
- 韭
- 茨菇菜夏月田內有之，殺蛇解毒，瀉脾胃之火。
- 龍眼宜成顆喫。

元眼肉惡有糖  
參·戒之·

荔子病重時·惟此  
二味可喫·

柑 柚 橙 橘 李

藕 棠梨

石榴

葛薯

西瓜

醋 茶

羊肉 猪肉 馬肉藥前喫·恐作渴·鰲水內之物·鵝鰲惟此可喫·

以上可吃之物。或一吃此物。則病翻者。必在此物內中毒。暫戒之。愈後可喫。

### 浸筍水法

凡筍皆可浸。惟味苦而豔者尤妙。筍用淨刀淨砧板。切片。放瓦罈內。用午後水浸之。不可吃葷犯嫩糠。水將浸過筍。不可多。後添生筍則添生水。

### 巴豆驅毒散

凡中蛇蠱者。肚內或皮內既變蛇。或變肉。鰲肉龜。或變虻蟲。凡遇肚痛時。大便結秘。少出。治方用巴豆一味。八歲以上小兒用二粒。十二歲以上用三粒。大人用六粒。將巴豆研末。水煨菖蒲滾。斟其湯。着茶杯內。俟其湯將涼。帶溫。放巴豆末入湯內。攪開。令病人連湯並未吞喫。靜坐片刻。作瀉。俟其肚內之物瀉盡。方可飲食。但此藥至奇。喫後有瀉十餘次者。最後屙出如雞蛋清。則不瀉矣。若未屙出雞蛋清。邊飲茶水。瀉即止。則毒未淨。後必復作。但服此藥。恐太虧人。先買真菉豆細粉四兩。煮熟。待瀉後。即將菉豆粉喫。此粉能解巴豆毒。或用滾水開蜂蜜喫。更妙。若喫後又作吐。再調稀粥喫。必愈。服此後。仍將蘇荷湯等方。加減服數劑。洗淨餘毒可也。愈後仍戒喫雞鴨魚蝦等物數年。

按巴豆一個剝開有三粒。兩頭尖者能殺人。不可用。此方楊生光熊世傳。醫愈蛇蠱者數十人。藥少價

廉收效又速。又試蛇蠱法。一凡身上皮肉刺痛。或腹內刺痛。喫筍水即暫愈者。或將馬兜鈴一兩。水煨湯服。而病即減者。定是中蠱。血氣健旺者。用巴豆方治之。頗捷。人弱者。忌用。孕婦忌用此方。

加減蘇荷湯

紫蘇五錢 南薄荷五錢 當歸七錢 川芎五錢 甘草五錢 澤蘭二錢 白芷五錢 首烏五錢

生芪五錢 百合五錢 陳皮二錢 三稜二錢 莪朮二錢 鬱金一錢 木香一錢 丁香一錢

五茄皮五錢

以上十七味爲一劑。生薑三片爲引。水煨服。

凡中一切蠱者。血氣平和。不受得生地。元參。黃柏。連翹。槐花。青蒿。生芍藥。柴胡等寒涼之劑。又不受得桂附等溫熱之味。用此方服驗。若服此湯後。大便秘結者。仍服蘇荷湯較妥。

蛇蠱

蛇蠱者。方書謂之桃生毒。傳聞山谷間獐婦。或歹人。於端午日。取毒蛇。蜈蚣。蝦蟇。同放一器內。令其自相吞嚙。用其生者研末。同黃泥作丸。包放竹筒內。其泥極腥。放出竹筒外。則見生蛇無數。能少能多。能短能長。能小能巨。能有形能無形。常用生雞蛋飼之。收入則成泥。或將少許蛇泥放路上。人踏過則蛇上人身。或放於茶酒內。與人喫。若酒醉甚。中毒者。戒鹽服藥可愈。

一曰生蛇蠱

有初中蛇蠱如外感症。面帶青色。氣逆氣短。肚皮緊急。兼之咳嗽。小便黃赤。內伏實熱。大便祕結。夜不得臥者。有初中不覺。至數月後。或一年後。時而在兩脅皮內痛。時而在兩肩下皮內痛。或數月痛一次。或一月痛一次。或一月痛數次。永不出汗。怕寒。服蘇荷湯後。如有聲走入肚內者。有在肚內痛。會動會移。痛時則氣欲絕者。

有遍身如風走竄。臥則手脚跳起。靜聽身上有如蝨行者。

有初積爲氣鬱不順。久而結爲血塊。久而成形。或爲虻蟲。或爲肉蛇。肉蟹。肉龜。或爲有鱗有脚。小蛇。或聚散無常。亦有終身止爲痞積。血積。食積。有常處者。

有夜臥忽然皮內。或背。或腹。或肩。時有一處微痛。會吸人氣。靜聽之。氣行至其處。則欲絕者。

有吐虻蟲者。按此症亦有因溼熱食積而生者。與蛇蠱同治。

有在心上脹。口涎出。痛而不移。常屙虻蟲者。

有在路上踏著者。或卽時肚痛極。或打冷顫。至數月後。小便常黃赤。人漸瘦弱。肚常作痛。凡遇肚痛時。行動則皮內。或肚內。有物墜實。夜臥以手按之。肚皮有物攏起。長二三寸。微覺跳動。心煩涎溢。得喫肉則稍止。或移入左脅右脅。則飯食減少。或痛上心。則心脹欲作吐。又此毒在身。時有時無。至年餘。或四五年。則變成肉蟹。肉龜。肉蛇。以作咬者。至蛇老時。或在皮內。肚內。行咬。有日咬一二十次者。命在頃刻。此時內蛇翻動作咬。則額焦頭痛。通身發熱。如有髮刺蟻咬。夜則更甚。此乃蠱家之外蛇。從風而至也。內蛇咬入臟

腑外蛇入毛孔。其蛇無形亦無數。急用雄黃四觔。分作四包。安於病人牀上四角。病人臥則開此四包。雄黃以禦外蛇。服藥方應。

一曰陰蛇蠱

初中時。或吐或瀉。以後則肚腹膨脹。不想飲食。口極腥。頭面上筋起。如蟲行。鼻內如有一二蟲欲出。不出。乃毒氣冲上。非蟲也。或耳內如有一蟲。亦毒氣也。或肚內如蛇翻有聲。甚則額熱面紅。大便結秘。若酒醉後在酒中受毒者。不獨腸臟青黑。卽肺肝心脾俱染黑氣。急服解毒發毒之藥。受毒重則屎黑。輕則屎藍。若不知解藥。則因黑氣而變成黑星。黑星有十顆。則肚內跳動如針刺。有十餘顆。便開成蛇口。如蛇咬狀。咬上心。出恭瀉血。命在旦夕。聞蠱醫云。中此毒者。若不知醫。不出一月必死。又加以癩藥。則人多昏聩。又加以腫藥。則一耳常滿。塞一耳朵。頭少紅厚。如有蟲行狀。服解藥。則黑氣隨屎出。但看食物全不變。如喫菜則屙菜。甚至喫飯則屙成顆飯。則毒淨矣。自此後食物仍變。出恭轉黃。則全愈矣。又毒重頭眩頭痛者。戒葷鹽半月。每殮用茶油清水。煮豆腐加筍水。一茶杯。同煮熟。淘飯喫。乃驗。病人有實火。俱用蘇荷湯治之。屢驗。至服藥病愈後。忽變內寒。須用十全大補湯。加減治之。

炙黃耆三錢 杜仲三錢 當歸五錢 炙甘草五錢 大熟地三錢 乾薑三錢 茯苓一錢 川芎五錢

丁香一錢 製首烏三錢 陳皮三錢 生芍藥二錢 白芷五錢 蘇子三錢 炒白朮三錢 木香一錢

附子二錢 肉桂一錢



右十八味爲一劑。水煨服。

經驗

同姓某年二十餘。中蠱。初中時。常在心口皮肉刺痛。繼又移上兩胸。上兩肩。下皮肉刺痛。繼又移下右脅。腰間皮肉刺痛。初則數月痛一次。後則一月痛一次。歹人謂之剪刀蠱也。病處其皮擁起。約四五寸長。痛甚時則兼肚脹。不出恭時而愈。則如無病。常怕寒。永不出汗。越三年餘。因喫雞鴨魚蛤等物。遂大痛。右邊半身刺痛。腰間皮內痛更甚。氣逆欲絕。予令其家人取筍水一碗。煮熱與之吃。吃後痛卽止。予曰。此中蠱也。彼疑而不信。予用蘇荷湯加酒一兩。同水久煨服。服藥後。通身發汗。其病如失。予復用雄黃五錢。研末。蒜子二三兩。菖蒲二三兩。搗爛。放滾水盆內。令病人用手巾自頭至脚。通身處處洗過。以防外蛇。是夜其人臥靜聽。如有蛇頭近身。伸舌舐之。以手摸之。則無所得。遂大驚而哭。次日變成瘡疾。身上又略痛。復用前藥煨服。則如有物會叫。自右脅腰間痛處。走入肚內。痛漸減。瘡疾亦愈。連服藥數日。小便鉢內。每夜洗淨。次早倒尿。則鉢底有小珠八九顆。大如粟。研開。珠內有血。再服藥。越二三日。則鉢內血珠止。有三四顆。再照前方服藥。越數日。則血珠全無。此乃毒氣積成惡血。服解藥。則毒隨小便出也。每兩日一劑。服藥一月而愈。後因同人歹人買肉醢飲。其病忽翻。肚內脹滿。通身刺痛。比前更甚。命在頃刻。照蘇荷湯取服。亦不見效。予思其故。或受歹人陰害。復中蠱也。因大加薄荷二兩。蘇子二兩。白芷二兩。田州三七二錢。當歸一兩。青蒿二兩。生地。生黃耆。柴胡。元參。川芎。槐花。條參。連翹。天門冬。天花粉。黃柏。各五錢。丁香一錢。木香。

一錢。共十九味爲一劑。酒一茶杯。同水煨服。一服而愈。此人年二十餘。血氣頗健。故用此重劑。後又將此十九味浸酒。加減兩數。令其人每早晚飲藥酒三四小杯。病遂全愈。

按若在酒內中蠱。則宜喫水藥。斷不可用酒。犯酒必翻。

族子某。年十六。肚內左脅常痛。忽又移過肚內右脅痛。或五六日痛一次。或二三日痛一次。或一日痛二三次。或走上心痛。則心脹頭熱。滿身發熱。痛時則並不出汗。得喫肉則暫停半日。身上常有蝨行。以手捉之。則無所得。予用蘇荷湯加三七一錢。酒一兩。同水煨服。兼服馬兜鈴二兩。爲一劑。水煨服。服一月。吐出黑星十餘顆。次日屙下虻蟲數條。自後肚亦不痛。但身上之蝨行仍然。予曰。此蛇蠱已愈。疥蠱未盡淨也。此後但服蘇荷湯。一年全愈。

張某中陰蛇蠱。初時如感冒風寒。四肢有虻行蟻咬。氣逆沖上。誤聽俗醫。教其喫蛇一條。于是遍身有蟲走竄。肉大跳。臥則手脚大跳。夜不得臥。危極。肚鳴肚痛。予授以蘇荷湯。酒水煨服。夜即得睡。連服二劑。次夜病翻。不得臥。彼疑藥味寒涼。不肯服。因取洋烟屎泡水喫。夜暫得睡。而病仍未愈。窮於治術。復將蘇荷湯。每劑加田州三七一錢。三日一劑。服藥兩月而愈。

李某子年八九歲。吐虻蟲不止。夜不得睡。用南薄荷。紫蘇。白芷。當歸。川芎。連翹。青蒿。槐花。生黃耆。柴胡。元參。各二錢。丁香一錢。三七一錢。水煨服數劑而愈。按凡老人幼兒中蠱。常將三七一味。切碎。蒸豬肺。成豬肉喫。甚妙。

潘某妻年三十餘。中蛇蠱。肚痛極。頃刻難忍。其戚授以三七。白芷。菖蒲。蒜子等生咬爛。滾水送。喫得吐與瀉而愈。但毒未淨。後仍常常肚痛。人漸瘦黑。積三四年。肚內如有物。會動會移。時跳上心。則心脹口涎出。得喫肉則稍止。予以紫蘇。南薄荷。元參。生黃耆。當歸。白芷。柴胡。川芎。青蒿。槐花。連翹。條參等。各三錢。服藥三劑。其毒如拳人。走在左脅下跳動。肛門如有蠱咬。又服藥三劑。其蟲亦化不見。但其毒仍在左脅下跳動。而通身四肢以及手足指盡皆脹痛。此乃蘇荷二味藥氣到處。追其惡血。瀉下大腸。將換新血。故脹痛也。又照前方服三劑。痛愈而下。身及兩脚浮腫。其夫疑之。予曰無妨也。蘇荷湯大半皆消腫之藥。但彼之受病已久。通身皆受毒氣侵染。變爲惡血。今藥力追到。通身之血瀉下。再換新血。其脹痛浮腫者。乃惡血初瀉。新血初生故也。再服前藥三劑。每劑加田州三七一錢。而浮腫亦消。但左脅之毒。仍然跳動。再照前方服藥。其毒亦漸小。漸化。服藥十餘劑。而愈。愈後不戒口。因吃鷄魚復變。心口痛。頭痛。脹滿。不思飲食。予復用生甘草。元參。紫蘇。南薄荷。當歸。川芎。生黃耆。連翹。白芷。白芍。條參。青蒿。槐花。各五錢。三七。生地。各一錢。二服而愈。後因喫狗肉病翻。復用前方治之愈。

李某妻年四十餘。中蛇蠱。初中蠱時。常在左邊脅下。腰間皮內。痛。痛時其處擁起。略跳動。日間則捲如螺。大夜則伸長。約二三寸。時而此物不見。則其病如失。時而痛移上心。則心脹。得喫肉則稍止。至五六年。變成一物。有頭尾足。在肚皮內。日咬三四十次。咬時則頭痛。遍身發熱。如有蟻咬。皮內如有髮刺。夜不得臥。予用紫蘇。南薄荷。生首烏。柴胡。槐花。白芷。當歸。生黃耆。連翹。生芍。川芎。各一兩。加燒酒二兩。同水久煨服。

服藥後。此物走入肚。跳入喉嚨。不能吐出。後復下肚皮內。走竄。病人垂危之極。夜不得臥。常思自盡。因用雄黃。如法放于床上四角。以禦邪氣。病人得睡。內服前方。兩日一劑。每殮用筍水一茶杯。煮菜喫。其物咬亦漸少。時而忽翻。復用巴豆驅毒散治之。其蛇漸縮小。再用前方。加鬱金木香各三錢。服藥十餘劑。其蛇遂化不見矣。愈後不肯戒口。肚腹復痛。又服前方一二劑而愈。越一年因喫蛤。其夜病大翻。肚脹身上刺痛。不得臥。肚內如有蛤叫聲。復依前方。加田州三七二錢。酒水煨服。二劑而愈。

龍某妻年三十餘。肚常痛。誤服川山甲。肚遂大痛。吐出虻蟲十餘條。不止。其鄉無藥。予急用紫蘇。薄荷。陳皮。槐花。田州三七等味。水煨服。蟲止不吐。令其家人出縣市藥。方用紫蘇。南薄荷。白芷。當歸。川芎。槐花。青蒿。連翹。生黃耆。柴胡。條參。元參。決明子。白芍。各五錢。木香二錢。酒同水煨服。數劑而愈。

女子及笄後。常得肚痛症。痛甚。則吐。予用田州三七五錢。洋參一錢。甘草一兩。紫蘇一兩。南薄荷一兩。酒一小杯。同水久煨服。即愈。再用生首烏一兩。白芷一兩。當歸一兩。川芎一兩。紫蘇一兩。南薄荷一兩。三七二錢。槐花五錢。連翹五錢。條參五錢。生甘草一兩。水煨服。十餘劑而病愈。永不復作。

楊某者年四十餘。得外感症。面帶青色。臥則氣逆。沖上肚皮。緊急兼之咳嗽。內有實熱。小便黃赤。夜不得臥。誤服補藥。肚愈脹。氣愈逆。嗽愈不止。予曰。此初中生蛇蠱也。用蘇荷湯。服數劑。病大減。予囑其常用田州三七切碎。煨豬肺。或豬肉喫。並常用蘇荷加減服。服藥二月餘。全愈。又凡中蠱氣急氣喘。脅痛。用洋參一味。生咬。喫亦驗。

老嫗年七旬餘。先有氣弱咳嗽之症。忽加中蠱。年餘。肚常痛。會動會走。腹內翻攪。脹痛。上心氣逆欲絕。不想飲食。夜不得眠。靜聽面上。如有蟲行。治方用百合五錢。蘇子三錢。南荷三錢。當歸三錢。茯苓三錢。白芷三錢。白芍三錢。麥冬三錢。連翹二錢。水煨服。照方服二劑。毒漸墜下。心不上脹痛。仍然在下部腹內走竄。如錐刺狀。再服藥四劑。瀉下黃泥水。次日瀉止痛。頗減。飲食稍加。再服藥三劑。變成痢疾。但此嫗血氣雖虛。不可用寒涼峻利之藥。亦不得十分溫補。予用百合五錢。蘇子。南荷。茯苓。白芍。麥冬。各三錢。砂仁。白朮。各二錢。乾薑一錢。水煨服。服至七八劑。毒漸墜下。病大減。但飢時。則其毒仍在內走竄。因停藥五六日。毒忽跳起。心上脹痛。如有蟲咬。方用百合四錢。蘇子。南荷。當歸。茯苓。麥冬。連翹。白芷。白芍。川芎。各二錢。水煨服。服後。即大瀉數次。病亟如前。予思老人血氣太弱。服藥宜緩。此方錢分太重。兼過於寒涼。改用蘇子三錢。當歸。三七。扁豆。川芎。廣陳皮。小茴香。蘿蔔子。各一錢。水煨服。服後得吐而病退。是夜得臥。蓋毒在上部。則吐。毒在下。則瀉也。次日復病。用蘇子五錢。百合四錢。赤芍。陳皮。各二錢。決明子。升麻。各一錢。水煨服。服後刺痛頗減。但一至飢時。吐內如有物咬。但照前方加白芷五錢。當歸二錢。服藥數劑。復變咳嗽。乃其常病也。依前方加減。蘇子五錢。百合四錢。升麻一錢。赤芍二錢。決明子一錢。白芷五錢。當歸二錢。麥冬一錢。去心。水煨服。一劑後。喉頗涼。仍然咳嗽。前方除麥冬。服二劑後。用前方。去升麻。赤芍。麥冬。加白芍二錢。陳皮二錢。芫花五錢。當歸五錢。用水煨服。五六劑。病大減。人頗康健。若停藥數日。則肚內如蛇微翻狀。但不能跳上耳。新年誤犯雞湯。兼停藥數日。病復翻。氣逆冲上。咳嗽喉苦極辣。肚脹翻攪。用蘇子三錢。廣陳

皮二錢。生首烏三錢。生甘草二錢。水煨服。一劑。病略減。再服不甚效。轉用蘇子五錢。百合四錢。白芍二錢。廣陳皮二錢。決明子一錢。白芷五錢。當歸四錢。芫花二錢。常服此方。病大減而仍未全愈。蓋老人血氣既衰。而中蠱又久。通身之血皆爲毒氣侵染。又不能受得蘇荷槐耆等重劑。故難全愈也。四月內停藥不服。通身脹痛。肚內復有物動攪。方用蘇子五錢。廣陳皮三錢。生甘草三錢。川芎一錢。白芷五錢。羌活三錢。鬱金一錢。三七一錢。水煨服。病減。服二劑。牙跟口脣熱爛。如蟲蝕狀。以蘇子。川芎。性太發陽故也。改用三七一錢。百合三錢。當歸二錢。生甘草五錢。白芷三錢。桔梗三錢。麥冬三錢。水煨服。四五劑。又常食三七豬肺。而病減。後停藥。復氣逆咳嗽。再加三七。照前方而不效。改用半夏三錢。當歸三錢。茯苓二錢。木香一錢。五味子二錢。廣陳皮三錢。生首烏三錢。生棗仁三錢。洋參一錢。服藥三劑。頗效。復加蘇子三錢。百合五錢。南荷一錢。服二劑。忽變白痢。且兼咳嗽。想此時蠱毒已淨。受得補藥矣。因買鴨一隻。苡米煨喫。病略減。改用炙黃耆五錢。炙甘草一錢。熟地三錢。小茴香一錢。白朮二錢。杏仁四錢。去皮尖。洋參一錢。薑汁炒。首烏一錢。杜仲三錢。當歸二錢。升麻五分。服藥一劑。病大減。再將此方加減服。而全愈矣。

男子年四十餘。脾胃虛寒。常服桂附歸朮耆地薑杞等藥。忽又中蠱。肚痛。身上如蚤咬。予用溫補兼行氣散氣之藥治之。大熟地五錢。當歸五錢。川芎三錢。炒白朮五錢。炙黃耆五錢。杜仲三錢。枸杞三錢。乾薑三錢。附子五錢。炙甘草五錢。陳皮二錢。丁香一錢。木香一錢。蘇子五錢。肉桂一錢。水煨服。數劑而愈。

按若心肝二經有伏火。照方加生芍三錢。茯苓三錢。又凡虛弱之人中蠱。審係內寒無火。卽用此方。

加減可也。若非脾腎虛寒，則附子肉桂二味，必不可用。孕婦忌用附子，似蠱非蠱辨。

有氣不順而非蠱者

童子十一歲，因先年冬染感冒，病愈後，次年得氣脫症。肚內氣走動不痛，行急則略痛，氣不順，氣少不接，飲食減少，口不渴，審係氣血兩虛，其父疑爲蠱病，服蘇荷湯不愈，忽變通身皮熱如火，肚腹脹滿，不思飲食，予用大懷熟五錢，製首烏五錢，炙黃耆五錢，製白朮五錢，北五味一錢，廣陳皮二錢，炙甘草二錢，全當歸三錢，炒山藥五錢，北枸杞五錢，杜仲五錢，附子五錢，乾薑五錢，水煨滾，加邊桂一錢，研末入湯調勻服，十餘劑而愈。

男子年四十餘，命門無火，寒極作嗽，口鼻流血，臥則肚內有物，隱隱升上，稍脹上心，此乃血脫氣脫之候，前方加杏仁一錢，服數十劑而愈。

童子十五歲，先得蠱症，既愈後，時而背心忽寒，或頂心忽寒，口不渴而口脣起泡，右手食指將指及無名指生疥瘡，經年腐爛不愈，亦服上方，附子加至七錢，數劑瘡疥暫愈，後又復翻，仍然手指腐爛，兼之氣短促不順，此氣血兩虛，兼之蠱病餘毒不盡，前方加田州三七一錢，白芷三錢，丁香一錢，數劑而愈。按果係脾腎虛寒，方用得此方。

有肚痛而非蠱者

近日有酒頂病七日必愈。雙頂十四日愈。將起病前二三日。手脚酸脹。次則在肚臍下痛。痛在一處不移。大便氣絕不通。小便黃赤。飲食百物皆不下。氣力如常。行動則稍快。日夜不得臥。至七日則必愈。不用服藥。愈後二三日不可下水。下水則病復翻。亦有病後寒積食積。作脹作痛。亦非蠱。按酒頂病大便不通。用槐花四兩。研末。同水熬酒煨熱。泡藥末喫。得瀉即愈。若係病後寒積。則槐花決不可用。至親秦某。得虛寒驚悸之證。命門無火。常將炙黃耆、白朮、當歸、熟地、肉桂等藥。浸酒喫。而愈。後因出外口渴。誤喫涼水。遂變寒嗽。用熟地、首烏、當歸、白朮、杏仁、乾薑、炙黃耆、山藥、附子、杜仲、枸杞、各五錢。北五味、肉桂各一錢。水煨服。而嗽大減。忽然出恭。盡帶藍色。此乃脾腎無火。不能運化穀食也。再服數劑而愈。

## 有心口痛而非蠱者

男子李某。先數日生一疔於腎囊下。谷道前。並不發起。忽然身體沉重。欲作吐。四肢皆麻。兼之冷顫。神昏譫語。心頭有一塊。大如碗口。作痛。先日好喫滾熱之茶。次日茶亦不喜吃。予曰。此必內寒也。用大熟地、當歸、炙黃耆、川芎、各五錢。乾薑、炙甘草、各四錢。肉桂一錢。研末。水煨服。服藥後。即不冷顫。心頭亦不痛。忽然谷道前之疔發起。一炷香久。即穿膿。再服數劑。前病全愈矣。

## 有肚鳴叫而非蠱者

童子年十三。手脚常酸脹。脚底常冷。肚常鳴叫。叫時則肚痛。大便溏泄。易飢。一喫茶則肚作叫。予診其六脈無力。乃血氣也。大熟地六錢。生甘草三錢。生山藥三錢。丹皮二錢。杜仲四錢。山萸肉三錢。炒白朮三錢。



木瓜二錢。澤瀉二錢。當歸二錢。生首烏三錢。廣陳皮二錢。茯苓一錢。懷牛膝三錢。附子二錢。水煨。滾入肉桂末一錢。和勻服。每月服二三劑。數月而愈。

一婦人年四旬餘。腰常酸痛。肚常鳴。大便溏泄。此乃脾腎虛寒。血虛氣脫之症。方用熟地。枸杞。當歸。炙黃耆。白朮。炙甘草。乾薑。山藥。首烏。附子。肉桂。巴戟。各五錢。水煨服。數劑而愈。

### 有腹寒作痛而非蠱者

男子某腹常痛。口不渴。大便時或溏泄。雖夏月必穿夾袄。用布帶緊紮其腹。或以炒熱嫩糠。放布袋內。熨之。而痛愈。後仍復作。用大熟地。製首烏。當歸。乾薑。焦朮。各五錢。川芎。炙甘草。各二錢。肉桂一錢。水煨服。數劑。痛愈。永不復作。按亦有肚寒痛而兼蠱者。照方加丁香。木香。蘇子。各一錢。水煨服。驗。

### 癩狂蠱論

聞蠱俗埋蛇土中。俟其出菌。取菌毒。人受其毒者。或癩或狂或癩。有心昏頭眩。笑罵無常。肚常鳴叫。大便結秘者。有赤身出外。持器械毆打人者。有毒甚則額必焦。口必腥。神昏性躁。目見邪鬼。形耳聞邪鬼聲。如犯大辟。如見惡役持練鎖至。如有刀兵健卒追趕。常思自盡者。有初中毒。肚內作痛者。有輕而時發羊癩豬癩者。以上諸病皆用蘇荷湯治之。服藥時宜戒葷鹽。每餐用茶油。或芝麻油。清水煮豆腐。加筍水一杯。煮飯滾。泡數日。服藥方效。

### 經驗

某生得癩症。時發時止。發則眼赤。不出恭。狼不能制。自脚腫上腎囊。時而毒氣至於手。則一手腫。時而一脚腫。時而兩脚皆腫。時而忽消。肚內常叫。如在臟外皮內叫。服蘇荷湯。追其毒入臟內。叫從大便化下。再專用蘇荷湯酒一茶杯。同水久煨服。數劑而愈。仍戒葷鹽。數日。每殮用茶油清水。煮豆腐。加筍水一杯。泡飯喫。

藍姓婦。身有胎孕。兼得癩症。發則面赤。喜笑無常。赤身出外。人不能阻。用蘇荷湯。去柴胡。生元板。決明。加生甘草。元參。各一兩。田州三七二錢。一劑而愈。

莫姓婦。得羊癩症。作則連發一二日。眼白涎出。不省人事。兼之身有孕胎。用前方。一劑而愈。

有癩狂而非蠱者

按大傷寒一症。實則火邪內鬱。脈強色厲。登高罵詈。狂呼躁擾。用蘇荷湯加減治之。亦可取效。若脈細無力。謔語撮空。尋衣摸席。此陽虛神脫之症。宜用附子。肉桂。熟地。當歸。川芎。山藥。炙黃耆。炙甘草。首烏。乾薑。枸杞。杜仲等味。加減治之。

中悶香癩蠱症

有頭熱如火。頭眩頭痛。心神煩躁。起坐一用心。則目昏暗。手軟。頸軟。嗜睡臥。時靜聽。其頭如一把火炎上。人昏嗜睡。得臥則暫愈者。又或頭不昏眩。並無別病。惟遍身發熱。口渴欲作吐。嗜睡。得臥則愈者。有頭痛。腦內有聲。口欲作吐者。三症俱宜戒葷鹽三四日。每殮用筍水一杯。沖清水。同茶油。或芝麻油。煮

豆腐喫或煮菜喫必愈不用喫別藥屢驗 中毒輕者卽喫橙子橄子橘柚棠梨李一切水果隨喫隨愈

### 經驗

宦家子得感冒症頭痛欲作吐服蘇子荆芥陳皮半夏白芍川芎桔梗茯苓炙甘草當歸蒼朮枳殼薑棗等藥加減不愈延余治之余診其兩尺脈微細無力疑其寒邪伏於腎與命門改用白朮杜仲炙黃耆乾薑首烏當歸川芎茯苓附子炙甘草肉桂服藥一劑而口渴作躁因用大熟地連翹生芍條參柴胡生甘草茯苓桔梗麥冬服藥一劑而病略減口不作嘔並無別病惟頭痛如故腦內瑟瑟有聲窮於治術因囑其戒葷鹽用茶油清水煮豆腐加笋水一杯煮滾泡飯喫次早卽愈又如法喫二三日遂全愈

按感冒頭痛則四肢必沉重若中悶香毒則氣力如常只是頭痛頭眩毒重則欲吐 又按有感冒頭痛欲作吐者臥床上轉身不得轉身則吐方用陳皮一兩薑一塊搗碎水煨滾服卽愈

### 腫蠱

腫蠱者蠱俗謂之放腫其病一也 有會走會移者毒氣至手則手腫至脚則脚腫至頭則頭腫肚內鳴叫如在臟外叫服解藥後則追其毒入臟內叫小便黃赤大便祕結 有通身浮腫刺痛肚大如鼓火鬱於內口出熱氣小便黃赤大便祕結者 有頭面浮腫一耳常塞大便祕結者

一切腫症果係中蠱用蘇荷湯治之一服病必大減久服必愈 又凡腫與癩狂二蠱病人夜不得安臥者必用雄黃如前法以禦外邪服藥方效

經驗

同姓某通身浮腫。刺痛。口出熱氣。腹大如鼓。肚臟外肚皮內叫。用蘇荷湯重劑。加茯苓。陳皮。三七。用燒酒二兩。同水久煨服。服後。皮內不叫。走入肚內鳴。俄而瀉下惡水數鉢。通身腫脹皆消。再服一劑。即全愈。某氏年近六旬。得腫症。自脚腫上到頭。約三四個月。其戚囑伊喫煨蜈蚣一條。腫益甚。遍身冷極。口亦不渴。其子問予。予曰。病者大便結秘否。內火盛否。其子答曰。無也。予曰。大便不結。內火不盛。則寒涼勿用也。方用紫蘇。南荷。生首烏。川芎。各五錢。白芷當歸各七錢。廣陳皮三錢。三七一錢。酒五錢。同水煨服。服藥後。即從脚消起。數劑。自脚消至頭。復自頭趕下脚。惟脚膝下尙腫。冷極。後聽一女醫。取草藥湯洗。停藥不服。未獲全功。若依此方加減。去紫蘇。南荷。重加三七三錢。五茄皮。炙黃耆。附子。各五錢。木瓜。杜仲。白朮。炙甘草。熟地。各三錢。懷牛膝。肉桂。木香。各一錢。必可愈也。

有浮腫而非蠱者

盧生祖。年七旬餘。手足頭面。遍身浮腫。腹大如鼓。生亦知醫道。審係脾腎虛寒。氣血兩虛之症。方用大熟地。當歸。製首烏。炙黃耆。杜仲。各一兩。炒山藥。焦朮。乾薑。枸杞。各七錢。木瓜。五加皮。各五錢。川芎。陳皮。各三錢。炙甘草。肉桂。各二錢。附子。一兩五錢。鹿茸。一錢。虎骨。一錢。水煨服。十餘劑而愈。

按附子不可妄用。必要辨得果係命門無火。方可用之。又或附子太多。咽乾無涎。煩躁不安。用生甘草五錢。水煨服。毒即解。或用生甘草一節。放入口。嚼爛嚥之亦可。

# 疳蠱論

疳蠱者。歹人謂之放蛋。又謂之放疳。又謂之放蜂。方書所謂金蠶蠱。大麻風。癩風者。卽疳蠱也。此千古不破之術。傳聞蠱俗於端午日。取蜈蚣。與各小蛇。馬蟻。蟬。蚓。蠅。蚰。蟲。頭髮等。研末。其人常刻一小五瘟神像。在房內。或箱內。奉之。常將毒藥置於神前。若將蛇蟲等末。放肉菜酒飯內。與人喫。則藥末粘於腸臟之上。初喫。輕則肚略脹。肚微叫。乃藥未化也。如粥滾狀。如欲瀉狀。乃藥氣行也。而出恭仍結實。若受毒重。則肚痛。肚常鳴。毒氣沖上。或鼻內。如有一二蟲。或耳內。如有一蟲。臥則肚大鳴。如蛇翻狀。出恭漸少。或一日一次。或二日一次。出亦不多。人必瘦黑。久或靜坐。頭髮內如有蟻咬。以手搓之。則無。或夜臥靜聽。面上如蟲行。如髮纏。如蚤咬。或肉忽跳。或身上如蟻咬。搓之則無。或肛門如有小蟲。小蛆。三四隻動。或身上如蛆行。或口旁如有涎蚰蟲粘上。拭之又無跡可尋。或忽然一手麻極。一脚麻極。或半手麻極。半脚麻極。此皆蠱毒到處則然。或初受毒不知。至一二月後。或因出外動作。或因洗身。或因靜坐於外。如有蜂飛來咬。靜聽片刻。身上如有數十蟻咬。搓之則氣散不見。或受蠱毒重者。卽時肚痛。身上如有蚤咬。蟻咬。蛆行。此必喫着歹人蠱藥。但此蠱藥在內。治不得方。斷不瀉出。其藥化一點。染在臟腑之上。則藥氣行於週身。氣到處卽如蟲咬。非真蟲也。氣降於肛門。則如蟲動。蛆動。氣隨屎出。非黑卽藍。亦有不黑藍而黃者。皆非真蟲也。至七八月。藥未化盡。肚鳴不歇。其氣沖上。如蛇翻狀。週身如蟲行。蟻咬。頂心髮極涼。如有蟲出入肉內。如有蟲行。蟻行。髮刺。蟬飛。小蜈蚣行。而蠱家平日所毒死之冤鬼。與其陰蛇。陰蟲。陰附之。病者如聞有飛

集之聲。而旁人不聞者。一見風則更甚。如蟲出入毛孔鼻門。如有數十蟲均飛來集。甚則下陰脚底如蟻咬者。此皆藥氣行走於週身。非真蟲也。至此時則手脚麻木。週身如麻布通風。腠理毛孔皆開。或手指脚指扯開。或脣掀。或身上肉跳。或面起紫泡。又加以腫藥。則一耳常滿。一耳朵頭少焦。紅厚。乃藥氣冲上也。又加以癩藥。則頭眩心昏。肚脹。凡中此蟲者。必要戒口。戒色。若不知戒色。小便一見白濁。則穢毒引入膀胱。變成五疳。則疳蟲先生於下部。兩內腎中。此時則實有蟲矣。早則數月。遲則兩三年。通身皮肉皆有崩塌。必死。若止知戒色。而不知藥方治服。小便雖未見白濁。終死於腫。此皆得之蠱醫之言。屢經驗者。

一疳蠱有在路上踏着者。或在山谷間感着者。踏着感着時。或打一冷顫。或昏迷倒地。或鼻血忽出。因而上身者。究之外感者易治。惟喫着人蠱藥。則難愈。然踏着者十中一二。

一疳蠱身上如蝨行。蟻咬髮刺。或身上作癢。以手搔之。則皮爛出汗者。

一疳蠱有遍身如癬。腐爛塌損。面紅脚腫。眉毛脫落者。

一疳蠱有手指脚指腐爛塌損者。有通身如鵝眼。小錢數百個。腐爛塌損者。有毒在脚面脚底。腐爛

塌損如蟲嚙成窟者。

一疳蠱重時。有日發一次。夜發一次者。有日發二次。夜發二次者。發時則遍身如有蟲行走。或有蜂數百

飛集者。

一疳蠱重時。毒氣走在頭。則如失其頭。走在手。則如失其手。走在脚。則如失其脚。毒氣在腦。則腦內有聲。

一疖蠱初服蘇荷湯方一二劑而頭面或通身發紅紫疹塊者多服十餘劑自愈。

一疖蠱有通身麻木肉大跳者。

一疖蠱有頭面上血忽開忽合者血開時其頭面如失去一半狀。

一疖蠱行時如有蛛絲纏於空中或如有芭蕉絲纏於空中視之不見身行至其處靜聽其絲自斷者。

一疖蠱有通身生皮癬久而腐爛變疖者。

一疖蠱服解藥後病必大減或時而其病如失時而病忽翻者無妨但照方服藥戒口自然病退。

一疖蠱之症怪異多般不可盡述總之輕則蠶行蚤咬重則虻行髮刺蟻咬蜂咬此則斷不可紊者以

上諸症但審病人小便未曾見白濁用蘇荷湯治之或用加減蘇荷湯治之必愈若大便結秘者槐花加至三兩。

一疖蠱或身上腐爛或下部玉莖旁溼爛外用槐花一兩白礬胆草各二錢煎水洗之週身雖如蟻蚤行咬乃藥氣行走不必疑懼凡飲食起居同室之人斷不傳染。

一蠱毒甚時則心肺肝脾皆受傷帶黑氣週身之血皆被毒藥染黑故宜靜養服藥先瀉大腸脾胃之毒氣後瀉肺肝心上之毒氣最後則週身血液瀝入肺肝心脾由肺肝心脾瀝入胃與大腸隨尿而出于是臟腑復生惡血瀉盡新血充滿自愈而紫蘇薄荷尤爲要品二味皆殺蛇且表其毒氣出於外筍水亦殺蛇但筍水止及腸胃而紫蘇殺荷二味追及心肺肝脾要之三味皆不可缺一者無力者每殮菜用茶油。

或芝麻油煎開水放生紫蘇薄荷葉及筍水一茶杯同各品菜煮喫。卽是要藥。無生菜。卽取根梗煎水同筍水茶油煮菜喫亦妙。若無紫蘇薄荷卽用筍水煮菜喫亦驗。又廣西田州三七尤爲治蠱要藥。若無三七卽重用澤蘭鬱金各一兩代之。

一紫蘇薄荷二味固治蠱要藥。但性太發揚。專服此二味因而實火炎上。口舌牙根熱爛。大便結秘。則此二味暫停。可用生地石膏連翹生芍條參茯苓天花粉生黃耆酒炒黃芩黃柏各五錢。槐花二兩。加燒酒一兩。同水久煨服。屢驗。

一疔蠱服解毒敗毒發毒之藥。則大便結秘者。蓋蠱毒在身。逢解藥則降下大腸。毒甚者初出恭黑。次出恭青。次出恭藍。或出恭有惡物如爛木耳者。此乃身上之惡血。隨腸臟瀝出也。亦有服藥二三劑而瀉血。二三日者。病愈更速。蓋蠱毒在身。其毒氣週流。通身之血皆黑。服藥之後。舊血瀉盡。新血自生。不足畏也。亦有服藥月餘。毒氣大減。時而尿黃。時而尿轉黑。或藍者。蓋惡血不瀉。則尿黃。惡血一瀉。則尿藍。惡血一點未淨。則出恭尙時帶藍色。然受毒雖極重。依方持戒。服藥至四五個月後。尿雖不淨黃。開鹽近色無妨。仍要服藥一二年。無力者常將紫蘇薄荷茨菇菜三味煨水當茶喫可也。又按亦有蠱毒雖極重。而出恭仍黃者。

一服藥將愈之時。一遇飯飧。通身發癢。此乃飯氣到處。新血與舊血戰也。食畢氣靜如常。此時齋戒鹽葷。則然。



一將愈之時。凡所食之物。出恭半不變。或肛門常脹者。此乃蠱毒將淨。不用服補藥。俟至食物全不變。則毒淨。或用補藥收功。以後出恭必黃。而病愈矣。

一凡出恭如有蟲三五隻隨恭出。視之不見者。其屎不黑則藍。否則必帶血絲。此乃毒藥之氣。非真蟲也。不必疑懼。

一凡蠱毒既淨。脾胃虛寒。宜服補藥。然既服補藥之後。時而大便結秘。蠱毒復翻。身上復有蚤蟻咬者。此乃餘毒未淨。仍取蘇荷湯。隨時加減煨服可也。

一疳蠱脚腫腐爛。照蘇荷湯。加鬱金。澤蘭。各一兩。服藥後。惡血從爛處流出者。無妨。

一酒醉後。在酒中喫著蠱毒。肺肝心痺受毒太重。照方服藥。月餘。蠱毒既退。酒毒忽發。口舌熱爛。則筍水與蘇荷等暫停半月。宜用連翹。生黃耆。甘草。生地。柴胡。槐花。黃栢。黃連。元參。石膏等藥。加酒同水煨服。俟火退後。仍照前方調治。

一凡老幼喫着人疳蠱多次。或因喫魚蛤腥物。而毒發於身。成癬者。或毒發於脚。成臙瘡者。或毒發于下部。溼熱潰爛者。或毒發於手背。虎口。手指間。如疥瘡。出汗。經年不愈者。或因喫馬肉發毒之品。表其毒出于鼻門。出汗者。或時而脚麻。時而肚痛。時而脚酸者。但果中其毒。人多瘦黑。身上必有如蚤咬。蟲行。

一婦有中疳蠱者。識者即爲提醒。彼亦不信。不知小人詭計百出。其包藏禍心。誠非易測。亦有付其藥與人以毒人者。又受此毒者。每有蠱家之冤鬼附之。故與之言別事。了然不迷。一語及其病。則偏疑爲天災。

又似得之數年前。或十餘年者。世有受此毒者。但看與某編內之論病相合。請照方戒口。暫醫一月。若病不減。不信也可。

一中疖或一二人。或三五人。同在一處受蠱藥。或各在一處受蠱藥。其一人受毒重者。先發。先發作一二月。或先發作半年。諸人漸此方知者。人或疑爲傳染。此決不可信。予蓋得之蠱醫之言。兼歷試之于中蠱之人者。至一切方書之論蠱論病者。皆不得其詳。不足信也。

一疖蠱受毒重時。夜則身熱頭痛。不得眠。用雄黃安床四角。又用雄黃研末二兩。蒜子四斤。生薑蒲一斤。切碎。三味同搗爛。分作四大碗。涼水泡之。用粗碗蓋住。兩碗安於病人床上。內邊兩碗。用獨凳兩隻。放於病人床旁。外邊將碗安凳上。病人臥時。則揭開上四粗碗。其氣沖上。邪不能侵。但水浸藥味易敗。或六日一換。或十日一換。所換之藥。聚放一器。留着病人房內。時時用柴攪之。其氣升騰。邪不能侵。

一疖蠱服藥後。病必大減。或時而如無病。或時而病忽翻者。無妨。但照方服藥。自然病退。

一中疖之人。脾腎虛寒。時常作泄。作瀉。則用溫補而兼行氣散血等藥。熟地。製首烏。枸杞。炙黃耆。炙甘草。生白芍。白朮。乾薑。當歸。附子。茯苓。蘇子。川芎。各五錢。陳皮。丁香。木香。肉桂。三七。各一錢。水煨服。照此加減。亦可取效。

一中疖之人。內有實火。兼之咳血咳嗽。則宜用滋陰而兼散血之藥。連翹。條參。生白芍。百合。槐花。青蒿。生黃耆。生首烏。生甘草。茯苓。生元版。麥門冬。各三錢。田州三七。二錢。西洋參一錢。水煨服。

經驗

某生年近四旬。中疝約一年。手足常麻。頂心髮涼。如蟲出入。肚常痛叫。遍身如蟻咬。或如蚓行。頃刻不安。面上常有髮纏。夜臥靜聽。其惡血所至。肢體如失。時而頭腦內有聲。或如蜂飛來咬者。出恭瀉血。予詢其小便。尙未白濁。因授以蘇荷湯。去決明。生元板。加五加皮。大生地。元參。黃柏。各五錢。酒一兩。同水久煨服。每二日一劑。服月餘。並戒鹽。病大減。但時止時作。至六個月。忽然小便帶綠色。予曰。此腎經濁氣瀉下也。照蘇荷湯加減服。小便轉清。踰年忽大瀉。問補藥可喫否。予曰。服藥至十八個月。甚毒已淨。可補矣。用大熟地。製首烏。杜仲。當歸。乾薑。炒山藥。白朮。炒扁豆。各五錢。炙甘草。丁香。各二錢。木香一錢。水煨服。方數劑。驗。但脾腎二經。忽變虛寒之極。以後每劑必加附子五錢。肉桂二錢。方收全功。而蘇荷翹芍等發表寒涼之味。毫不可犯矣。

廿某夜往別村回。半路忽然打一冷顫。遍身麻木。畏風怕寒。通身肉跳。時而如有蜂飛來咬。以手搓之。則無。予舍親用蘇荷湯加燒酒一兩。同水煨服。初作吐。再服遂大瀉。其家人大驚。欲打壞藥罇。予舍親令其上床靜臥。至次早。其病十減七八。舍親曰。昨所服藥。錢數太重。一日兩劑。服藥太急。故吐瀉並作耳。復如前方。每日一劑。一月而愈。

按凡各蠱放在路上者。人踏過則上身。又聞蠱醫云。放在路上之蠱。秀才。道士。鬼師。斷不能染。惟放在茶酒菜肉內喫着。則無可避耳。

西鄉某人中疔。身上如蟻咬。先用草藥煎水洗。而血聚成癥。如雲片者。但小便尙未白濁。後遇謝某。令服蘇荷湯數劑。其血癥移走無定處。疑而問予。予曰。此乃蘇荷湯之藥力。追其毒降下大腸也。但照方多服。惡血瀉淨自愈。囑其依法戒口。復服十餘劑。血癥盡消。再服三個月而愈。

粟某年三十餘。遍身生牛皮癬。約二十年。遇夏秋則發。交冬則漸愈。其癬發痒時。如有百餘蚤蟲。聚於癬處。後因嗜飲酒。並喫鱸魚等物太多。至冬亦不愈。身上與兩手兩腿。皆腐爛變疔。大便結秘。少出小便黃赤。通身發熱。夜臥不可蓋被。因而感冒作嗽。予詢其小便尙未見白濁。則毒未曾傳至腎經也。蘇荷湯去首烏。決明。生元板。加茯苓七錢。生地一兩。每二日一劑。燒酒二兩。同水久煨。服七八劑。而爛平。囑其戒口。照方加減。數月而愈。

謝某中疔數年。因喫馬肉。毒發于外。左右手指皮。俱起小微泡。發痒。抓去小微泡。則皮破。皮肉損塌。兩脚亦然。身上如蚤蟻咬。時而有蜂飛集肚內。嗚叫。出恭結實。頭痛額極熱。小便黃赤。用蘇荷湯。加酒一兩。同水煨服。二劑。皮破處結疤矣。兩月而愈。

羅某年六旬餘。中疔。惟左手有蚤蟻咬極多。頭上身上亦有。醫令喫狗肉。病愈重。夜不得臥。小便尙未白濁。授以蘇荷湯一劑。毒表于手背上。如紅雲片。大小十餘朵。再服二劑。通身皆發紅雲塊。而蚤咬蟻咬頗少。於是每二日一劑。復十餘劑。而紅血塊盡消。復三十餘劑。而蚤蟻咬俱無。但覺頭眩腰痛。此身上毒將淨。服涼藥太多。故腎寒腰痛耳。製用首烏。當歸。白芷。各一兩。乾薑。大熟地。炙黃耆。杜仲。炙甘草。川芎。百

合各五錢。丁香一錢。水煨服。二劑而愈。

韋某年三十餘。中疝數年。身上如蚤蟻咬。俗醫用草藥湯淨洗。盡不愈。左脚指崩塌。落去二指。其脚腫皮厚。筋縮如蛇鱗。如雲片。舉步維艱。耳厚面紅。眉毛盡落。後遇舍親秦集大。詢其小便。尙未白濁。用蘇荷湯治之。服藥一劑。其夜即得睡。次夜病翻重。不得睡。用雄黃蒜子二斤。如法安放。仍服前方。令戒口戒色。自三月起至十月全愈。脚筋復伸。眉毛復出。

按世必無癘風不可醫之證。其所云癘風者。卽中歹人之疝蟲耳。喫着蠱毒者。則從肚痛起。踏著蠱毒者。則從肉跳起。世之受毒者。果照此篇內服藥戒口。無有不愈。

覃某年三十餘。中疝數年。時醫用草藥湯洗。並針砭各法。皆不愈。又令將硫黃泡酒喫。日甚一日。面紅耳厚。遍身如癬。如紅雲朵。甚多。毒墜於下。左右兩脚青腫。每角落一指。縮一指。時時流汁。身上如蟻咬。虻行兩脚。更甚。後遇秦某。詢伊小便。未曾白濁。令戒色。戒鹽。戒口。用雄黃如法。以禦外邪。先用蘇荷湯。加三七二錢。酒水煨服。二劑。瀉下惡血。病漸輕。再服二劑。大便結祕。病翻重。蟻咬更多。夜不得臥。予謂恐火伏于內。宜純靜清涼之藥。改用生地。生芪。茯苓。生芍。連翹。條參。柴胡。元參。生甘草。茜草。各六錢。槐花。青蒿。決明子。各一兩。加燒酒二兩。同水久煨。滾入田州三七末五錢。調勻服。每二日一劑。二劑。頭面眼與下身發腫。而蚤蟻咬漸少。再服二三劑。腫消病減。又服藥四月而愈。

按脚爛處。用紫蘇。薄荷。茨菇菜。三味。煎水湯洗。後用此三味。烘乾。研末。撒上爛處。亦不痛癢。作咬。而汁

乾結疤矣。

潘某背心兩腿各生牛皮癬一塊。夏秋則發。冬則消。發時身如蚤蟻咬。背間更甚。予用蘇荷湯。重加蘇荷二味。各一兩五錢。燒酒二兩。同水久煨服。其背上患處。反痛極不癢。此藥氣追至受毒處也。再服十餘劑而愈。

閩客林某女。約八歲。兩臂兩脚。身上皆生疖。皮膚塌損。如銅錢大者。數十處。予視其必係胎毒。幸未傳至腎經。用蘇子。南荷。柴胡。白芷。槐花。青蒿。連翹。條參。白芍。當歸。生地。各二錢。元參。金銀花。田州三七。各一錢。加燒酒五錢。同水久煨。空心服十餘劑而愈。

一幼孩纔一歲。左耳根常腐爛。出汁。脚生一瘡。既結疤。復爛。出汁。口舌蝕爛。似屬胎毒。用蘇子。南薄荷。生黃耆。川芎。白芷。百合。桔梗。槐花。青蒿。澤蘭。鬱金。生甘草。生首烏。五加皮。連翹。當歸。各一錢。燒酒一錢。同水煨服。二劑而愈。乳母仍戒口十日。凡幼孩頭面生瘡毒。似疖。出汁。服此方經驗。

陳某夫妻皆生疥瘡。兩年餘。纏綿不愈。其妻兩脚已腐爛變疖。其夫通身及手足亦皆似疥非疥。似疖非疖。艱於舉步。詢小便尙未白濁。用紫蘇。薄荷。生黃耆。青蒿。當歸。川芎。槐花。白芷。連翹。條參。白芍。生地。各五錢。元參。茯苓。各三錢。黃柏二錢。加燒酒一兩。同水煨服。各五劑而愈。

有先中蠱而後兼咳血者

龔某中疖數月。通身蝨行。蟻咬。手脚時而麻極。有楚人授以黑藥末。用雞蛋同豬油炒熟。研生韭菜汁。和

勻。夜搽身上。晨起皮內出蟲如蝨大。脚多如百脚蟲形。每早上得蟲數百。有吳某者。不問其詳。概以平日酒風病醫之。治以炙黃耆。桂枝。補血去風之藥。遂變爲咳血。咳嗽神昏。狂言謔語。大便少出。危極。予詢其小便。尙未白濁。但既吐血。則蘇荷自宜暫停。囑伊飲食間。宜親自檢點。防左右有歹人。暗加蠱毒。則藥難取效。方用槐花。決明子。百合。青蒿。各一兩。生地六錢。元參。條參。連翹。白芍。貝母。黃柏。生甘草。各五錢。三七三錢。水煨服。一劑卽得出恭。狂言咳血俱止。再服四劑。則如無病矣。但身上癢尙未全愈。又兼兩脚風痛。蓋此人平時亦有脚痛病。予改用殺蛇解蠱。去風止痛等味。方紫蘇。南薄荷。各七錢。生黃耆。柴胡。各六錢。白芍。條參。連翹。各五錢。生地。元參。黃柏。各三錢。田州三七二錢。茜草三錢。加燒酒一兩。同水久煨服。數月而愈。

### 有先咳血而後中蠱者

某生年二十餘。先得陰虛咳血之症。內有實火。服藥年餘。忽得蠱症。腹內痛。身上如蚤蟻咬。用紫蘇薄荷等發表藥以治蠱。則實火愈盛。仍然咳血。兼之遺精。欲專用純靜清涼之藥。以治陰虛火盛之病。則蠱毒復作。予診其脈。惟腎與命門肝經有實火。囑伊戒口。用大生地一兩。女貞子。槐花。地骨皮。天門冬。各五錢。知母六錢。元參。青蒿。決明子。田州三七。各一兩。茜草。桑白皮。柴胡。生黃耆。各三錢。連翹。麥門冬。去心。各二錢。黃柏六錢。水煨服。蠱毒仍不退。後每劑加田州三七一兩。此味乃殺蛇解蠱之藥。數服而病大減。但藥重價昂。五日服一劑。服五個月。而蠱病愈。忽又變通身發熱。如火。嗜臥。恐又中別毒。囑伊戒葷鹽五六日。

每殮用茶油或芝麻油同清水煮菜加筍水一茶杯。煮熟飯喫。數日愈。仍照原方服藥。月餘而蠱毒已淨。虛火未退。因用清補之味。大生地。元參。條參。枸杞。白朮。生首烏。當歸。桑白皮。生白芍。各三錢。服十餘劑全愈。越半年。忽變脾腎虛寒。後用十全大補湯。加減服。大熟地。製首烏。杜仲。炒白朮。炒山藥。炙黃耆。枸杞。當歸。附子。茯苓。生白芍。各五錢。炙甘草。陳皮。丁香。川芎。肉桂。各一錢。服十餘劑。遂收全功。

有內寒無火而兼中蠱者

有婦人年四十餘。脾腎虛寒。常服桂附參茸歸耆地朮薑棗木瓜虎骨等藥酒。忽中疝。身上如有蚤咬。強行夜臥不安。肚常痛。而大便仍溏泄。予用十全大補湯。加減治之。大熟地。製首烏。炙黃耆。乾薑。陳皮。炒白朮。各三錢。杜仲。當歸。川芎。白芷。炙甘草。各五錢。茯苓。白芍。木香。丁香。各二錢。蘇子。附子。各五錢。水煨滾。入肉桂末一錢。攪勻服之。二劑而愈。

有內有實火蠱毒雖退實火炎上者

某生素患陰虛。常服滋陰清涼之藥。後因飲酒中毒。酒醉已極。蠱毒甚重。生蛇。陰蛇。顛腫。疝。蠱。五毒兼受。遍請蠱醫服藥不效。命在頃刻。夜不得臥。垂危之至。予令買雄黃四斤。如法掛床四維。復研雄黃末四兩。同蒜子四斤。生薑蒲一斤。確爛。分作四碗。用涼水泡之。安置於床之四角。上用四粗碗。蓋住病人。臥則揭開上四粗碗。其氣沖上。邪不能染。每十日一換。夜得安臥。復囑戒葷戒鹽戒色。用茶油或芝麻油同清水。煮豆腐。加筍水一茶杯。無筍水。則將筍同豆腐清水煮滾。泡飯喫。詢其小便尙未見白濁。毒未傳至腎經。



因授以蘇荷湯。去生元版。加生地。元參。各六錢。水煨服。月餘。蠱毒大退。酒毒忽發。實火炎上。口舌熱爛。大便祕結。改用槐花二兩。青蒿生黃耆。柴胡。生首烏。連翹。生白芍。生地。各七錢。元參。黃柏。條參。天門冬。決明子。知母。生甘草。酒炒黃芩。茯苓。各五錢。加酒二兩。同水久煨。服藥十餘劑。而病愈。越四個月。方開葷鹽。以後不得犯酒。一飲酒。則病翻。惟煨藥。必用酒。同水煨服。收效更捷。一遇病翻。實火炎上。大便祕結。口舌熱爛。必用後一方。加減。服十餘劑。方驗。

### 有脾土虛而兼中蠱者

某生年二十餘。中疳蠱。惟下半身如蚓行。蚤咬。脾土素屬虛寒。兼有心痛症。不受寒涼之劑。而心肝肺三經。又有微火。亦不受熱劑。予用加減蘇荷湯。不用生薑。水煨服。十餘劑。蠱症及心痛俱愈。惟脾腎虛寒。常作瀉。而心與肝仍有微火。因改用熟地。附子。炙黃耆。酒炒白芍。焦朮。炙甘草。製首烏。炒山藥。各五錢。乾薑一兩。廣陳皮。白芷。各二錢。當歸三錢。丁香。木香。各一錢。水煨服。數十劑。而愈。

### 有中蠱餘毒未淨忽變瀉痢者

某生中疳蠱。愈後。餘毒未盡。實火炎上。口舌熱爛。常服槐花。生白芍。連翹。生黃耆。柴胡。茯苓。黃柏。知母。元參。條參。生地。等味。酒水同煨。服一二年。忽變瀉痢。下部寒甚。上部有火。口舌熱爛。兩尺脈無力。脾腎虛寒。肝與心經有伏火。方用焦朮。炙黃耆。各一兩。焦薑二兩。製首烏。炙甘草。生白芍。茯苓。各五錢。附子五錢。炒扁豆。炒山藥。杜仲。各三錢。豆蔻。丁香。木香。各一錢。水煨服。數劑而愈。前十味。逐脾腎命門之寒。生白芍。

茯苓。清心肝之火。丁香。木香。溫中散寒。止瀉痢。殺蟲。

按凡中蠱愈。餘毒未淨。犯一切寒痢症。有全用桂。附。薑。朮。者。烏。芎。歸。甘。陳。丁。木。香。等。味。者。有。肉。桂。不。可。用。止。用。附。子。薑。朮。者。烏。甘。陳。丁。香。茯。苓。白。芍。者。有。附。子。不。可。用。止。用。肉。桂。甘。陳。薑。朮。者。烏。芎。歸。丁。香。吳。萸。茯。苓。白。芍。者。有。桂。附。不。可。用。止。用。甘。薑。者。朮。烏。山。藥。白。芷。陳。皮。丁。香。川。芎。者。有。用。桂。附。不。用。茯。苓。白。芍。者。總。之。因。人。隨。時。加。減。原。不。可。泥。又。按。中。蠱。餘。毒。未。淨。感。胃。頭。痛。四。肢。沉。重。作。嘔。作。吐。口。不。渴。者。多。係。虛。寒。照。前。方。加。當。歸。五。錢。川。芎。二。錢。服。經。驗。若。先。感。暑。而。後。感。寒。服。前。方。一。劑。既。去。其。寒。即。宜。服。清。熱。之。藥。

按疳蠱一證。有七八年小便未白濁者。有終身小便未白濁。並不服藥戒口。亦無妨者。有一二年小便白濁者。其受毒必重。

按凡中疳。喫著人蠱毒者居多。出外踏著者十中一二。但蠱毒在路上踏著。何以上身。蓋蠱家平日所毒死之人。人死則其鬼受役於蠱家。其蠱毒放在路上。必有冤鬼守之。人踏過。則重者必昏迷。一刻。輕者亦打一冷顫。乃冤鬼與惡蛇之邪氣。附於其身上。所以通身麻木肉跳。或如蚤蟻咬。或如蜂咬。或如風走竄。不知持戒服藥。則邪氣日進。正氣日減。故受毒者。小便未白濁。必宜服發散藥。如紫蘇。薄荷。川芎。柴胡。生薑等味。是也。必宜服解毒藥。如連翹。甘草等是也。必宜服殺蠱藥。如槐花。青蒿等是也。必宜服殺蛇藥。如三七。白芷。丁香。木香。紫蘇。薄荷等是也。必宜服清熱藥。如生地。天門冬。元參。連翹。條參。槐花。青蒿。決明。

子生黃耆。黃柏。知母。茯苓。生芍等是也。必宜服降氣藥。如紫蘇。薄荷。木香。陳皮。藿香等是也。必宜服滲降藥。如茯苓。澤瀉等是也。必宜服消腫藥。如紫蘇。薄荷。生白芍。條參。連翹等是也。必宜服散血行血藥。如蘇木。生首烏。當歸。茜草。鬱金。三稜。莪朮。澤蘭。五加皮等是也。斷不可喫補藥。恐補其邪氣。深入而不出。然亦有不可泥者。或其人脾腎虛寒。大便溏泄。或腹寒作痛。命門無火。宜大補氣血。如熟地。炙黃耆。製首烏。炒山藥。當歸。杜仲。焦朮。乾薑。附子。肉桂等。以治其本。兼用蘇子。丁香。木香。三七。澤蘭。五加皮。鬱金。三稜。莪朮。陳皮。白芷。茯苓。生白芍等味。以治其標可也。

又按凡被蛇咬。毒復入內。照蘇荷湯。加木香。丁香。各二錢。燒酒一兩。同水煨。空心服。必愈。一中疔身癢。外用苦楝樹皮。椿樹皮。搗爛。同浮萍。加鹽一撮。煎水洗。甚驗。

### 變疔論

按中疔。蠱受毒既重。不知持戒。小便一見白濁。遂變五疔。先從下部。左右兩內腎。腐蝕生蟲。後至皮外。場損腐爛。生蟲而蠱毒在身。一見風來。如有羣蟲飛集。通身如髮刺。蟲咬。到此時。則五臟受傷。一切發表之藥。斷不可喫。一切發毒之物。斷不可喫。亦不可服補藥。然亦難挽回矣。

### 擬中疔既變疔後所用藥品

大生地 槐花 元參 條參 連翹 百合 白芍 青蒿 茜草 決明子 澤瀉 茯苓 花粉  
黃連 麥門冬 梔子 黃柏 丹參 川貝母 知母 三稜 天門冬 龍胆草 莪朮 犀角

茯神 黃芩 羚羊角 生洋參 生首烏 地骨皮 大熟地 金銀花 車前子 廣西田州三

七 大黃大便祕結者加此味一錢

以上諸品皆可酌用。倘若病人脾腎虛寒，不能受寒涼等味，在用藥者，因人隨時變通斟酌，加減神而明之可也。

經驗

有婦人年四十餘，中疳，受病既重，不知持戒，小便已見白濁，予徒不問其詳，令單用紫蘇薄荷二味，煨湯服。伊又誤燒狗骨，泡酒喫，忽然病大翻重，通身如有蟲咬，兩鼻孔內如有兩蛇出，伸舌舐面顴，手指脚指，如有蟲出入，兩肩兩脅腰間，足膝處處皆有蟲行，蚓蟠，夜臥床上，如有千萬蟲，驚懼昏迷，眯眼自想，如有火星閃躍，自思其頭如脚盆大，其身如穀圍大，身常冷顫，喜近火，頃刻難安，予曰：小便已見白濁，腎經必生疳蟲，不得復用蘇荷等發表之物，仍要戒鹽戒色戒口，或可醫也。用槐花、青蒿、決明子各一兩，生白芍、生地、元參、連翹、條參各八錢，茯苓、黃柏、知母各六錢，田州三七二錢，加燒酒一兩，同水久煨，空心服，服十餘劑，病遂大減。月餘變紅白痢，此乃惡血瀉下也，已無蚤蟻咬，但肚常痛，肚內心頭常有物翻攪，時而作咬，予照原方加三七、三稜、莪朮各三錢，酒同水煨服。至九月，腎經疳毒已盡，惟蠱毒未愈，十月內喫發表等藥，照前方加紫蘇、薄荷、五加皮、當歸、川芎、生首烏、甘草各七錢，木香二錢，服數月而病全愈。

聞蠱家用竹葉放水。中同蠱藥浸之。卽變泥鰕魚。煮與客喫。食畢肚內脹滿。如有泥鰕三五條行走。痛不可忍。時而冲上喉嚨。時而走下肛門。大便不通。不知治。必死。

### 附石頭蠱論

聞蠱俗將石頭一塊。放於路上。結茅標一二人。人行過。則石跳上人身。或入肚內。初中肚內。硬實作痛。至三四月。則會動。肚鳴。大便結秘。人漸瘦黑。時而此石飛入兩手。時而飛入兩脚。痛不可忍。不出三五年。其人必死。

### 附箴片蠱論

聞蠱俗將竹箴一片。約四五寸。放于路上。人行過。則此箴跳上脚腿。痛不可忍。久則此箴入于膝蓋。脚漸小如鶴膝。不出四五年。其人必死。又或箴跳上身。肚內作痛。如虻蟲在肚內翻攪。痛不可忍。走下肛門。則作脹欲出。恭亦不出。如有小刀在肛門。不上不下。不知醫。數日卽死。

以上三症。得之風聞。未及親見。或用加減蘇荷治之。必愈。

### 附鴉片烟四耗論

一鴉片烟耗神。凡人夜喫鴉片烟。則通宵不寐。乃神散也。夫晝作夜息。人之常情。然或先天稟賦健旺。夜亦少眠者。神足也。或良朋聚談。通宵不眠者。神喜也。或事變之來。寢不安枕者。神驚也。或氣血虛寒。心腎不交。或火熾痰鬱。陽亢於陰。夜不得寢者。神脫也。乃本倦而欲眠。竟強以鴉片烟提汁之。使其神散而不

藥不得成寢。此乃助長之術。其初似亦無損。至其浸久。神愈散。則人愈弱。以夜爲晝。而躁動不安。俾晝作夜。而長寢不起。百事廢弛。職由此乎。

一鴉片烟耗氣。凡人之生。皆陰陽二氣。周流於一身。無時或息。乃喫鴉片烟者。烟之氣增一分於身上。則我身之元氣減一分。烟之氣增五分子身上。則我身之元氣減五分子。久之。則烟氣勝。元氣少。遂變烟癩。故半日不得喫烟。則淚流涕出。腰間如雞啄。如針刺。頃刻不安。三日不得喫烟。則屙痢不止。百藥不效。得喫烟。則稍止。其所以瀉痢者。元氣脫也。元氣既脫。惟借烟氣以提升之。薰灼之。得喫烟。則稍止也。然雖稍止。究之客氣日勝。正氣牾亡。欲求如不喫烟者之自適也得乎。

一鴉片烟耗精。凡喫鴉片烟之人。精液消耗。多不育子。至上癮既久。變成烟癩。停一日不得烟喫。夜臥則精液從小便流出。不止。得烟喫。則稍愈。除烟則百藥不效。此非烟之能把持乎。精液也。蓋得烟之氣。則提其精液上行。而精液內耗。猶可暫延。不得烟之氣。則元氣已經剝削。精液自脫。下流而不止也。夫至於精液日涸。不亦危矣乎。

一鴉片烟耗血。凡人一身血脈健旺。則顏色光潤。若喫鴉片烟之人。漸久。則陽縮。而顏色青血虧也。再久。則癩作。而顏色黑。血枯也。又久。則四肢筋縮。如龜鱉形。血消已盡。不能養筋也。至於四肢筋縮。則精亡血涸。雖生如死矣。況血既消耗。肺枯蟲生。多變勞瘵。咳嗽。至其甚時。喉嚨內蟲欲出不出。終日咳嗽不止。此時一日不得烟喫。則命在頃刻。卽時時不斷烟。亦不過苟延旦夕耳。尙忍言哉。尙可問哉。

按鴉片烟既有四耗。則壽必不長。而喫烟之人。亦未見遽死者何也。蓋既上癮之後。惟以烟爲命。祖宗財產皆不顧恤。至家產既盡。不顧品行。凡可以得烟者。無不爲之。或計窮智屈。烟無所出。不得已而勉強戒烟。任其淚流涕出。瀉痢遺精。或間日以生烟少許。泡水喫。以稍止其癮。或以烟屎泡水喫。以止其癮。從此忍烟至年餘。雖我身之元精正氣。漸漸復充。而烟癮之發。瀕死者已數十次矣。外人不知。遂以爲吸烟無害。亦安知此中之閱歷苦楚乎。況戒烟一方。惟強壯之年。方能行之。若老年血氣既衰。烟癮又深。卽重用人參。白朮。炙黃耆。懷山藥。肉桂。附子等味。以補其氣。鹿茸。鹿膠。當歸。首烏。龜膠等味。以補其血。熟地。枸杞。兔絲子。牛膝。蒺藜等味。以補其精。虎骨。五加皮。杜仲等味。以壯其筋。肉苳。扁豆。吳萸等味。以止其痢。麥冬。連翹。條參。白芍。甘草。茯苓。犀角。玉竹。百合等味。以殺蟲降火。解毒而止嗽。亦難挽回也。戒之哉。凜之哉。

又鴉片烟對日對時。連喫三日。則上癮者何也。凡人之元氣。周流於一身者。若日月之行於天焉。晝夜不息。如本日亥時。其氣行至尾閭。此時喫烟。則提其氣上行。而尾閭之真氣減一分。明日亥時。其氣復行至尾閭。此時又喫烟。則尾閭之真氣又減一分。又明日亥時復喫烟。則尾閭之真氣又減一分。於是真氣已虧。至其時不得喫烟。則尾閭酸脹。坐臥不安。蓋真氣已空。又無烟氣以充之也。舉一時言。其餘可以類推。

今世俗之吸烟。昉自明天啓間。其時守邊士卒多中寒死。非烟不治。故嚴禁之亦不止。今則三尺童

子。皆視吸烟爲常事矣。然未有如鴉片之流毒深也。凡私販鴉片之人。曰賣土。曰買土。吸食鴉片之具。曰烟鎗。曰墩。曰炮。語已不經。至吸食有一定時刻。稍遲卽性命懸于呼吸。一似暗設機械。以束縛吾民之肢體。豈不痛哉。夫時俗之好尙。人心係焉。凡今日泉刀布幣器皿顏色之屬。無一不以稱洋者爲居奇。卽鴉片亦美之曰洋烟。吾不知再閱數百年後。鴉片亦如今世之吸烟。竟不足爲怪耶。抑天不惠此民。將耗盡其脂膏骨髓而後已耶。布衣野老。蓋有不敢言不忍言者矣。姑就見聞所及。作鴉片四耗論。以附路氏治蠱新方後。俾天下知鴉片之毒。不異于蠱。而鄙人所論。亦庶幾治蠱之新方焉。此則區區所厚望者矣。道光乙未九日澄江漁者書。





素 女 方

撰 人 不 詳

素女方

本館據平津館叢  
書本排印初編各  
叢書僅有此本

# 素女方序

素女方一卷。見隋書經籍志。其名不載。漢藝文志。然卽神仙家黃帝雜子十九家方二十卷之一也。其書自宋不傳。鄭樵通志藝文略。載其目。亦僅蹈襲前志。隋唐猶有傳本。王夔取入外臺祕要卷十七中。云出古今錄驗。真古書也。書稱黃帝與素女高陽負問答。述交接之禁忌。敘四時之藥物。以爲房中却病之術。云凡經方。神仙所造。蓋古人方藥。傳授有本。配合君臣佐使。皆按陰陽五行。若遇俗醫。加減用之。卽有偏重之弊。治疾所宜慎擇。且文句有韻。以逆爲迎。以知爲愈。皆古字古義。審非後人僞作。恐傳寫旣久。或有脫誤。及鄙俗字。悉仍舊文。不敢更改。房中之術。古有傳書。容成務成。堯舜陰道。俱一家之學。班氏所云樂而有節。則和平壽考。迷者弗顧。以生疾而隕性命。誠哉斯言。予旣刊黃帝古書。又刊此以備亡佚古書之一種。不獨後之志藝文者可增其目。亦足資養生之助云。千金翼方卷五云。行房法一依素女經。婦人月信斷。一日爲男。二日爲女。三日爲男。四日爲女。以外無子。每日午時夜半後行事生子吉。餘時生子不吉。亦此書佚文。并附于序。嘉慶十五年九月廿八日。孫星衍撰于安德道署之平津館。



# 素女方

黃帝問素女曰。男子受氣。陰陽俱等。男子行陽。常先病耳。日本其所好。陰痿不起。氣力衰弱。不能強健。敢問療之道。素女曰。帝之所問。衆人同有。陰陽爲身。各皆由婦人。天年損壽。男性節操。故不能專心貪女色。犯之竭力。七傷之情。不可不思。常能審慎。長生之道也。其爲疾病。宜以藥療之。今所說犯者七。第一之忌。日月晦朔。上下弦望。六丁之日。以合陰陽。傷子之精。令人臨敵不戰。時時獨起。小便赤黃。精空自出。天壽喪身。第二之忌。雷電風雨。陰陽晦暝。振動天地。日月無精光。以合陰陽。生子令狂癲。或有聾盲瘡癩。失神或多忘誤。心意不安。忽常喜驚恐。悲憂不樂。第三之忌。新飽食飲。穀力未行。太倉內實。五藏防響。以合陰陽。六腑損傷。小便當赤。或白或黃。腰脊疼痛。頭項寄彊。或身體浮腫。心腹脹滿。毀形夭壽。天道之常。第四之忌。新小便精氣微弱。榮衛不固。衛氣未散。以合陰陽。令人虛乏。陰陽氣閉。絕食無味。腹脹滿結。怫鬱不安。忘誤或喜怒無常。狀如癩發。第五之忌。作事步行。身體勞。榮氣不定。衛氣未散。以合陰陽。藏氣相干。令人氣乏。喘息爲難。唇口乾燥。身體流汗。穀不消化。心腹脹滿。百處酸疼。起臥不安。第六之忌。新息沐浴。頭身髮溼。舉重作事。流汗如雨。以合陰陽。風冷必傷。少腹急痛。腰脊疼彊。四肢酸疼。五藏防響。上攻頭面。或生漏瀝。第七之忌。共女語話。玉莖盛彊。以合陰陽。不將禮防。氣腠理開。莖中痛傷。外動肌體。內損腑藏。結髮塞耳。目視眊眊。心中怵惕。恍惚喜忘。如杵舂膈。欬逆上氣。內絕傷中。女絕痿弱。身可不防。犯此七篇。形

證已彰。天生神藥。療之有方。

黃帝問高陽負曰。吾知素女明知經脈藏腑虛盈。男子五勞七傷。婦人陰陽隔閉。漏下赤白。或絕產無子。男子受氣。陰陽同等。其病緣由。因何而起。故欲問之。請為具說。對曰。深哉問也。男子五勞六極七傷。病皆有元本。由狀。帝曰。善哉。七傷之病。幸願悉說。對曰。一曰陰汗。二曰陰衰。三曰精清。四曰精少。五曰陰下濕。六曰小便數少。七曰陰痿。行事不遂。病形如是。此謂七傷。黃帝曰。七傷如是。療之奈何。對曰。有四時神藥。名曰茯苓。春秋冬夏。療隨病形。冷加熱藥。溫以冷漿。風加風藥。色脈診評。隨病加藥。悉如本經。春三月。宜以更生丸更生者秋。療男子五勞七傷。陰衰消。小囊下生瘡。腰背疼痛。不得俛仰。兩膝臄冷。時時熱癢。或時浮腫。難以行步。目風淚出。遠視眈眈。欬逆上氣。身體痿黃。遠臍弦急。痛及膀胱。小便尿血。莖痛損傷。時有遺瀝。汗衣赤黃。或夢驚恐。口乾舌彊。渴欲飲水。得食不常。或氣力不足。時時氣逆。坐犯七忌。以成勞傷。此藥主之。甚驗方。

茯苓 四分。若不消食。三分加一。

兔絲子 四分。若痿洩。三分加一。

細辛 四分。若目眈眈。三分加一。

蛇床子 四分。若少氣。三分加一。

遠志皮 四分。驚恐不安。三分加一。

菖蒲 四分。若耳聾。三分加一。

牛膝利 四分。若機關不。加一倍。

防風 四分。若風邪。三分加一。

柏實 四分。若少力。加一倍。

石斛 四分。若體疼。加一倍。

山茱萸 四分。若身癢。三分加一。

赤石脂 四分。若內傷。三分加一。

署預 四分。若陰濕。三分加一。

巴戟天 四分。若痿弱。三分加一。

杜仲痛 四分。若絕陽腰。三分加一。

括樓根 四分。若熱渴。三分加一。

乾地黄 七分。若頑熱。三分加一。

續斷 四分。若有痔。加一倍。

天雄風 四分。炮。若有。三分加一。

菴蓉 四分。若冷痿。加一倍。

右二十味。搗篩。蜜和丸。如梧桐子大。先食服三九。日三。不知漸增。以知爲度。亦可散服。以清粥飲方寸匕。七日知。十日愈。三十日餘氣平。長服老而更少。忌豬羊肉。錫冷水。生菜。蕪荑等物。

又黃帝問曰。夏三月。以何方藥。幸得具聞。對曰。宜以補腎茯苓丸。療男子內虛不能食飲。忽忽喜忘。悲憂不樂。恚怒無常。或身體浮腫。小便赤黃。精泄淋瀝。痛絞膀胱。脛疼冷痺。伸不得行。渴欲飲水。心腹脹滿。皆犯七忌。上已具記。當療之法。隨病度量。方用如左。

茯苓食不消。加一倍。 附子炮。有風。三分。加一。各二兩。

牡丹腹中游氣。三分。加一。各二兩。 澤瀉有水氣。三分。加一。

細辛目視眩暈。三分。加一。各三兩。 石斛二兩。陰溼癢。三分。加一。

山茱萸三兩。身癢。三分。加一。 杜仲腰痛。三分。加一。

署預頭風。加一倍。 桂心顏色不足。三分。加一。

菴蓉三兩。身癢。三分。加一。 黃耆四兩。體疼。三分。加一。

右十二味。搗篩。蜜和丸。如梧桐子。先食服七九。日二服。忌生葱。生菜。豬肉。冷水。大酢。胡荽等物。

又黃帝問曰。春夏之療。已聞良驗。秋三月。以何方藥。對曰。宜以補腎茯苓丸。療男子腎虛冷。五藏內傷。風冷所苦。令人身體濕痒。足行失顧。不自覺省。或食飢失味。目視眩暈。身偏拘急。腰脊痛強。不能食飲。日漸羸瘦。胸心懊悶。欬逆上氣。轉側須人。起則扶鼻。鍼灸服藥。療之小折。或乘馬觸風。因房室不自將護。飲食不量。用力過度。或口乾舌燥。或流涎出口。或夢寤精便自出。或尿血。尿有淋瀝。陰下痒濕。心驚動悸。少腹偏急。四肢酸疼。氣息噓吸。身體浮腫。氣支胸脅。醫不能識。妄加餘療。方用如左。

茯苓三 防風 桂心 白朮 細辛 山茱萸 署預 澤瀉

附子炮 乾地黄 紫苑各二兩 牛膝三兩 芍藥 丹參 黃耆 沙參

菴蓉 乾薑 元參 人參 苦參 獨活各二兩

右二十二味。搗篩。蜜和丸。如梧子。食前服五丸。臨時以酒飲下之。忌酢物。生葱。桃李。雀肉。生菜。豬肉。蕪荑等。

又黃帝問曰。春夏秋皆有良方。冬三月復以何方治之。對曰。宜以垂命扶苓丸。療男子五勞七傷。兩目眊眊。得風淚出。頭項等強。不得迴反。心腹脹滿。上支胸脅。下引腰脊。表裏疼痛。不得喘息。飲食欬逆。面目痿黃。小便淋瀝。清精自出。陰痿不起。臨事不對。足脛酸疼。或五心煩熱。身體浮腫。盜汗流離。四肢拘攣。或緩或急。夢寤驚恐。呼吸短氣。口乾舌燥。狀如消渴。忽忽喜忘。或悲憂嗚咽。此藥主之。補諸絕。令人肥壯。強健氣倍常。飲食百病除愈方。

扶苓 白朮 澤瀉 牡蒙 桂心 牡蠣熬 牡荊子 署預

杜仲 天雄炮 人參 石長生 附子 乾薑 菟絲子 巴戟天

菴蓉 山茱萸 甘草炙 天門冬各二兩去心

右二十味。搗篩。以蜜和丸。如梧子。先食服五丸。酒飲皆得。忌海藻。菘菜。鯉魚。生葱。豬肉。酢物等。

又黃帝問曰。四時之藥。具已聞之。此藥四時通服。得不對曰。有四時之散。名扶苓散。不避寒暑。但能久服。長生延年。老而更壯。方用如左。



茯苓 鍾乳研 雲母粉 石斛 菖蒲 柏子人 菟絲子 續斷

杜仲 天門冬去心 五味子 牛膝 澤瀉 遠志去心 甘菊花 蛇床子

署預 天雄炮 山茱萸 乾地黃 石韋毛去 菴蓉並分

右二十二味。擣篩為散。以酒服。方寸匕。日再。二十日。知。三十日。病悉愈。百日以上。體氣康彊。長服八十

九十老公。還如童子。忌酢物。羊肉。鰾魚。豬肉。蕪荑等。

高陽負曰。凡經方。神仙所造。服之。療病。具已論訖。如是所擬。纔從開闢以來。無病不治。無生不救也。並出古今

錄驗二十  
五卷中。